

Nowodhow an Seythen

03 / 01 / 09

Bledhen nowyth da dhywgh hag ottavy ow tehweles gans Nowodhow an Seythen.

**

Wos'talleth, Ayrborth Kernow a dhasigoras kyns Nadelik.

Res o dhe'n konsel y dhegea rag teyr seythen awos kudyn kavos kummys dhyworth an CAA.

Byttegyns nyns usi Ryanair dehwelys hwath.

Rewloryon an kowethas a leveris bos edhom dhedha gortos bys yn Kala Meurth.

**

Ha hwi ow koslowes orth an bolletyn ma, an diwettha gwerthjiow Woolworths yw deges.

Golok druethek o gweles an gwerthjiow ma gwag, ha pubtra ynna gwerthys... keffrys ha'n kadoryow, estelenow hag erel.

Pandra wra lenwel agan stretow meur lemmyn?

**

An kaskyrgh erbynn logo nowyth Konsel Kernow re gavas deg mil hanow skrifys war an petyshyon.

An para a gonslers onsevyek a lever bos diskwedhyans bodh pobel Kernow.

Mes nyns eus sin vyth hwath bos rewloryon an konsel nowyth ow treylya y'ga brys.

Pennsodhek Mester Lavery re gewsis yn hir a-dro dhe'n pyth a vynn ev a-barth Kernow hag ev nowyth devedhys omma.

Yth esa ev penn a Serco y'n termyn eus passyes. Henn yw an kowethas neb a wra lies gonis yn Kernow y'n eur ma.

**

Ha ni ow kewsel a-dro dhe'n konsel nowyth... otta ni yn dew vil ha naw... an vledhen may fydh chanj bras dhyn ni.

Gwenton – kelli a wren agan hwegh konsel konteth... ha Konsel Kernow keffrys.

Gorrys y'ga le y fydh unn konsel nowyth.

An govyn yw... a wra an chanj mos war-rag heb hockyans?

**

Neb chanj aral dalleth an vledhen ma a vydh koll agan towlen nowodhow pellwolok der ITV.

Westcountry Live a wra degea ha'n nowodhow rag Breten Veur Soth West oll a vydh gwrys
dhiworth Bristow.

**

Henn yw oll dhyworth Nowodhow an Seythen a'n seythen ma.

Bys nessa prys!